

নানা কবিতা

বাল্যরচনা

বর্ষাকাল

গভীর গর্জ্জন সদা করে জলধর,
উথলিল নদনদী ধরণী উপর।
রমণী রমণ লয়ে, সুখে কেলি করে,
দানবাদি দেব, যক্ষ সুখিত অন্তরে।
সমীরণ ঘন ঘন ঝন ঝন রব,
বরুণ প্রবল দেখি প্রবল প্রভাব।
স্বাধীন হইয়া পাছে পরাধীন হয়,
কলহ করয়ে কোন মতে শান্ত নয় ॥

হিমঋতু

হিমস্তের আগমনে সকলে কম্পিত,
রামাগণ ভাবে মনে হইয়া দুঃখিত।

মনাগুনে ভাবে মনে হইয়া বিকার,
নিবিল প্রেমের অগ্নি নাহি জ্বলে আর।
ফুরায়েছে সব আশা মদন রাজার
আসিবে বসন্ত আশা— এই আশা সার।
আশায় আশ্রিত জনে নিরাশ করিলে,
আশাতে আশার বশ আশায় মারিলে।
সৃজিয়াছি আশাতরু আশিত হইয়া,
নষ্ট কর হেন তরু নিরাশ করিয়া।
যে জন করয়ে আশা, আশার আশ্বাসে,
নিরাশ করয়ে তারে কেমন মানসে ॥

গান

প্রস্তাবনা

রাগিণী ঋষাজ, তাল মধ্যমান
মরি হায়, কোথা সে সুখের সময়,
যে সময় দেশময় নাট্যরস সবিশেষ ছিল রসময় !

শুন গো ভারতভূমি,
কত নিদ্রা যাবে তুমি,
আর নিদ্রা উচিত না হয়।
উঠ তাজ ঘুম ঘোর,
হইল, হইল ভোর,
দিনকর প্রাচীতে উদয়।

কোথায় বাস্মীকি, ব্যাস,
কোথা তব কালিদাস,
কোথা ভবভূতি মহোদয়।
অলীক কুনাট্য রঙ্গে,
মঞ্চে লোক রাঢ়ে বঙ্গে,
নিরখিয়া প্রাণে নাহি সয়।

সুধারস অনাদরে,
বিষবারি পান করে,
তাহে হয় তনু মনঃ ক্ষয়।

মধু বলে জাগ মা গো,
বিভু স্থানে এই মাগ,
সুরসে প্রবৃত্ত হউক তব তনয় নিচয় ॥

উপসংহার

রাগিণী বসন্ত, তাল ধীমা তেতাল

শুন হে সভাজন!
আমি অভাজন,
দীন ক্ষীণ জ্ঞানগুণে,
ভয় হয় দেখে শুনে,
পাছে কপাল বিগুণে,
হারাই পূর্ব মূলধন!

যদি অনুরাগ পাই,
আনন্দের সীমা নাই,
এ কাষেতে একষাই,
দিব দরশন!

গীতিকবিতা

আত্ম-বিলাপ

১

আশার ছলনে ভুলি কি ফল লভিনু, হয়,
তাই ভাবি মনে ?
জীবন-প্রবাহ বহি কাল-সিন্ধু পানে ধায়,
ফিরাব কেমনে ?
দিন দিন আয়ুহীন, হীনবল দিন দিন,—
তবু এ আশার নেশা ছুটিল না ? এ কি দায় !

২

রে প্রমত্ত মন মম ! কবে পোহাইবে রাতি ?
জাগিবি রে কবে ?
জীবন-উদ্যানে তোর যৌবন-কুসুম-ভাতি
কত দিন রবে ?
নীর-বিন্দু দুর্বাদলে, নিত্য কি রে বলবলে ?
কে না জানে অস্বপ্ন অস্বপ্নে সদ্যঃপাতি ?

৩

নিশার স্বপন-সুখে সুখী যে, কি সুখ তার ?
জাগে সে কাঁদিতে !
ক্ষণপ্রভা প্রভা-দানে বাড়ায় মাত্র আঁধার
পথিকে ধাঁধিতে !
মরীচিকা মরুদেশে, নাশে প্রাণ তৃষাক্রম্বে,—
এ তিনের ছল সম ছল রে এ কু-আশার ।

৪

শ্রেমের নিগড় গড়ি পিরিলি চরণে সাধে ;
কি ফল লভিলি ?
জ্বলন্ত-পাবক-শিখা- লোভে তুই কাল-ফাঁদে
উড়িয়া পড়িলি !
পতঙ্গ যে রঙ্গে ধায়, ধাইলি, অবোধ হয় !
না দেখিলি, না শুনিলি, এবে রে পরাণ কাঁদে !

৫

বাকী কি রাখিলি তুই বৃথা অর্থ-অশ্বেষণে,
সে সাধ সাধিতে ?

ক্ষত মাত্র হাত তোর মুগাল-কন্টকগণে
কমল তুলিতে !

নারিলি হরিতে মণি, দংশিল কেবল ফণী !
এ বিষম বিষজ্বালা ভুলিবি, মন, কেমনে !

৬

যশোলাভ লোভে আয়ু কত যে ব্যয়িলি হয়,
কব তা কাহারে ?
সুগন্ধ কুসুম-গন্ধে অন্ধ কীট যথা ধায়,
কাটিতে তাহারে,—

মাৎস্য-বিষদশন, কামড়ে রে অনুক্ষণ !
এই কি লভিলি লাভ, অনাহারে, অনিদ্রায় ?

৭

মুকুতা-ফলের লোভে, ডুবে রে অতল জলে
যতনে ধীবর,
শতমুক্তাধিক আয়ু কালসিন্ধু জলতলে
ফেলিস, পামর !
ফিরি দিবে হারাধন, কে তোরে, অবোধ মন,
হায় রে, ভুলিবি কত আশার কুহক-ছলে !

বঙ্গভূমির প্রতি

“My native Land, Good night!”

— Byron

রেখো, মা, দাসেরে মনে, এ মিনতি করি পদে ।
সাধিতে মনের সাধ,
ঘটে যদি পরমাদ,
মধুহীন করো না গো তব মনঃকোকনদে ।
প্রবাসে, দৈবের বশে,
জীব-তারা যদি খসে
এ দেহ-আকাশ হতে,— নাহি খেদ তাহে ।
জন্মিলে মরিতে হবে,
অমর কে কোথা কবে,
চিরস্থির কবে নীর, হায় রে, জীবন-নদে ?
কিন্তু যদি রাখ মনে,
নাহি, মা, ডরি শমনে ;
মঙ্কিকাও গলে না গো, পড়িলে অমৃত-হুদে !

সেই ধন্য নরকুলে,
লোকে যারে নাহি ভুলে,
মনের মন্দিরে সদা সেবে সর্ব্বজন ;—
কিস্ত কোন গুণ আছে,
যাচিব যে তব কাছে,
হের অমরতা আমি, কহ, গো, শ্যামা জন্মদে !

তবে যদি দয়া কর,
ভুল দোষ, গুণ ধর,
অমর করিয়া বর দেহ দাসে, সুবরদে !—
ফুটি যেন স্মৃতি-জলে,
মানসে, মা, যথা ফলে
মধুময় তামরস কি বসন্ত, কি শরদে !

নীতিগর্ভ কাব্য

ময়ূর ও গৌরী

ময়ূর কহিল কাঁদি গৌরীর চরণে,
কৈলাস-ভবনে ;—
“অবধান কর দেবি,
আমি ভৃত্য নিত্য সেবি
প্রিয়োস্তম সুতে তব এ পৃষ্ঠ-আসনে ।
রথী যথা দ্রুত রথে,
চলেন পবন-পথে
দাসের এ পিঠে চড়ি সেনানী সুমতি;
তবু, মা গো, আমি দুখী অতি !
করি যদি কেকাধ্বনি,
ঘুণায় হাসে অমনি
খেচর, ভূচর জন্তু ;— মরি, মা শরমে !
ডালে মুঢ় পিক যবে
গায় গীত, তার রবে
মাতিয়া জগৎ-জন বাখানে অধমে !
বিবিধ কুসুম কেশে,
সাজি মনোহর বেশে,
বরেন বসুধা দেবী যবে ঋতুবরে
কোকিল মঙ্গল-ধ্বনি করে ।
অহরহ কুহুধ্বনি বাজে বনস্থলে ;
নীরবে থাকি, মা, আমি ; রাগে হিয়া জ্বলে !
ঘুচাও কলঙ্ক শুভঙ্করি,
পুত্রের কিস্কর আমি এ মিনতি করি,
পা দুখানি ধরি ।”
উত্তর করিলা গৌরী সুমধুর স্বরে ;—
“পুত্রের বাহন তুমি খ্যাত চরাচরে,
এ আক্ষেপ কর কি কারণে ?
হে বিহঙ্গ, অঙ্গ-কান্তি ভাবি দেখ মনে !
চন্দ্রককলাপে দেখ নিজ পুচ্ছ-দেশে ;
রাখাল রাজার সম চূড়াখানি কেশে !

আখণ্ডল-ধনুর বরণে
মণ্ডিলা সু-পুচ্ছ ধাতা তোমার সৃজনে !
সদা জ্বলে তব গলে
স্বর্ণহার ঝল ঝলে,
যাও, বাছা, নাচ গিয়া ঘনের গর্জনে,
হরষে সু-পুচ্ছ খুলি
শিরে স্বর্ণ-চূড়া তুলি;
করণে কেলি ব্রজ-কুঞ্জ-বনে ।
করতালি ব্রজাঙ্গনা
দেবে রঙ্গে বরাঙ্গনা—
তোষ গিয়া ময়ূরীরে, প্রেম-আলিঙ্গনে !
শুন বাছা, মোর কথা শুন,
দিয়াছেন কোন কোন গুণ,
দেব সনাতন প্রতি-জনে ;
সু-কলে কোকিল গায়,
বাজ বজ্র-গতি ধায়,
অপরূপ রূপ তব, খেদ কি কারণে ?”—
নিজ অবস্থায় সদা স্থির যার মন,
তার হতে সুখীতর অন্য কোন জন ?

কাক ও শৃগালী

একটি সন্দেশ চুরি করি,
উড়িয়া বসিলা বৃক্ষেপরি,
কাক, হাষ্ট-মনে;
সুখাদ্যের বাস পেয়ে,
আইল শৃগালী ধেয়ে,
দেখি কাকে কহে দুষ্টা মধুর বচনে ;—
“অপরূপ রূপ তব, মরি !
তুমি কি গো ব্রজের শ্রীহরি,—
গোপিনীর মনোবাঞ্ছা ? — কহ গুণমণি !

হে নব নীরদ-কান্তি,
ঘুচাও দাসীর ভ্রান্তি,
যুড়াও এ কান দুটি করি বেণু-ধ্বনি !
পুণ্যবতী গোপ-বধু অতি !
ঠেঁই তারে দিলা বিধি,
তব সম রূপ-নিধি,—
মোহ হে মদনে তুমি ; কি ছার যুবতী ?
গাও গীত, গাও, সখে করি এ মিনতি !
কুড়াইয়া কুসুম-রতনে
গাঁথি মালা সুচারু গাঁথনে,

রসাল ও স্বর্ণ-লতিকা

রসাল কহিল উচুে স্বর্ণলতিকারে ;—
“শুন মোর কথা, ধনি, নিন্দ বিধাতারে !
নিদারূপ তিনি অতি ;
নাহি দয়া তব প্রতি ;
ঠেঁই ক্ষুদ্র-কায়া করি সৃজিলা তোমারে ।
মলয় বহিলে, হায়,
নতশিরা তুমি তায়,
মধুকর-ভরে তুমি পড় লো চলিয়া ;
হিমাদ্রি সদৃশ আমি,
বন-বৃক্ষ-কুল-স্বামী,
মেঘলোকে উঠে শির আকাশ ভেদিয়া !
কালান্বিত মত তপ্ত তপন তাপন,—
আমি কি লো ডরাই কখন ?
দূরে রাখি গাভী-দলে,
রাখাল আমার তলে
বিরাম লভয়ে অনুক্ষণ,—
শুন, ধনি, রাজ-কাজ দরিদ্র পালন !
আমার প্রসাদ ভুঞ্জে পথ-গামী জন ।
কেহ অন্ন রীধি খায়
কেহ পড়ি নিদ্রা যায়
এ রাজ চরণে ।
শীতলিয়া মোর ডরে
সদা আসি সেবা করে
মোর অতিথির হেথা আপনি পবন ।
মধু-মাখা ফল মোর বিখ্যাত ভুবনে !
তুমি কি তা জান না ললনে ?

দেখ মোর ডাল-রাশি,
কত পাখী বাঁধে আসি
বাসা এ আগারে ।
ধন্য মোর জনম সংসারে !
কিস্ত তব দুখ দেখি নিত্য আমি দুখী ;
নিন্দ বিধাতায় তুমি, নিন্দ, বিধুমুখি !”
যুদ্ধার্থ গভীরতার বাণী তব পানে !
সুধা-আশে আসে অলি,
দিলে সুধা যায় চলি,—
কে কোথা কবে গো দুখী সখার মিলনে ?”
“ক্ষুদ্র-মতি তুমি অতি”
রাগি কহে তরুপতি,
“নাহি কিছু অভিমান ? ধিক্ চন্দ্রাননে !”
নীরবিলা তরুরাজ ; উড়িল গগনে
যমদূতাকৃতি মেঘ গভীর স্বননে ;
আইলেন প্রভঞ্জন,
সিংহনাদ করি ঘন,
যথা ভীম ভীমসেন কৌরব-সমনে ।
আইল খাইতে মেঘ দৈত্যকুল রড়ে ;
ঐরাবত পিঠে চড়ি
রাগে দাঁত কড়মড়ি,
ছাড়িলেন বজ্র ইন্দ্র কড় কড় কড়ে !
উরু ভাসি কুরুরাজে বখিলা যেমতি ।
ভীম যোধপতি ;
মহাঘাতে মড়মড়ি
রসাল ভুতলে পড়ি,
হায়, বায়ুবলে
হারাইয়া আয়ু-সহ দর্প বনস্থলে !
উদ্ধৃশির যদি তুমি কুল মান ধনে ;
করিও না ঘৃণা তবু নীচশির জনে !
এই উপদেশ কবি দিলা এ কৌশলে ॥

অশ্ব ও কুরঙ্গ

১

অশ্ব, নবদুর্ব্বাময় দেশে,
বিহরে একেলা অধিপতি ।
নিত্য নিশা অবশেষে
শিশিরে সরস দুর্ব্বা অতি ।

বড়ই সুন্দর স্থল,
 অদূরে নির্ঝরে জল,
 তরু, লতা, ফল, ফুল,
 বন-বীণা অলিকুল ;
 মধ্যাহ্নে আসেন ছায়া,
 পরম শীতল কায়া,
 পবন ব্যঞ্জন ধরে,
 পত্র যত নৃত্য করে,
 মহানন্দে অশ্বের বসতি ॥

২

কিছু দিনে উজ্জ্বলনয়ন,
 কুরঙ্গ সহসা আসি দিল দরশন ।
 বিশ্বয়ে চৌদিকে চায়,
 যা দেখে বাখানে তায়,
 কতক্ষণে হেরি অশ্বে কহে মনে মনে ; —
 “হেন রাজ্যে এক প্রজা এ দুখ না সহে ।
 তোমার প্রসাদ চাই,
 শুন হে বন-গোঁসাই,
 আপদে, বিপদে দেব, পদে দিও ঠাই ॥”

৩

এক পার্শ্ব করি অধিকার,
 আরঙিল কুরঙ্গ বিহার ;
 খাইল অনেক ঘাস,
 কে গণিতে পারে গ্রাস ?
 আহার করণান্তরে
 করিল পান নির্ঝরে ;
 পরে মৃগ তরুতলে
 নিদ্রা গেল কুতূহলে—
 গৃহে গৃহস্বামী যথা বলী স্বত্ববলে ॥

৪

বাক্যহীন ক্রোধে অশ্ব, নিরখি এ লীলা,
 ভোজবাজি কিম্বা স্বপ্ন ! নয়ন মুদ্রিতা ;
 উন্মীলি ক্ষণেক পরে কুরঙ্গে দেখিলা,
 রঙ্গে শুয়ে তরুতলে ;
 দ্বিগুণ আশুন হাদে জ্বলে ;
 তীক্ষ্ণ ক্ষুর আঘাতনে ধরণী ফাটিল,
 ভীম হ্রোষ গগনে উঠিল ।
 প্রতিধ্বনি চৌদিকে জাগিল ॥

৫

নিদ্রাভঙ্গে মৃগবর
 কহিলা, “ওরে বর্কর !
 কে তুই, কত বা বল ?
 সৎ পড়সীর মত
 না থাকিবি, হবি হত ।”
 কুরঙ্গের উজ্জ্বল নয়ন
 ভাতিল সরোষে যেন দুইটি তপন ॥

৬

হয়ের হৃদয়ে হৈল ভয়,
 ভাবে এ সামান্য পশু নয়,
 শিরে শৃঙ্গ শাখাময় ।
 প্রতি শৃঙ্গ শুলের আকার
 বুঝি বা শুলের তুল্য ধার,
 কে আমারে দিবে পরিচয় ?

৭

মাঠের নিকটে এক মৃগয়ী থাকিত,
 অশ্ব তারে বিশেষ চিনিত ।
 ধরিতে এ অশ্ববরে,
 নানা ফাঁস নিরন্তরে ।
 মৃগয়ী পাতিত ।
 কিন্তু সৌভাগ্যের বলে, তুরঙ্গম মায়া-ছলে
 কভু না পড়িত ॥

৮

কহিল তুরঙ্গ ;— “পশু উচ্চশৃঙ্গধারী—
 মোর রাজ্য এবে অধিকারী ;
 না চাহিল অনুমতি,
 কর্কশভাবী সে অতি ;
 হও হে সহায় মোর,
 মারি দুই জনে চোর ॥”

৯

মৃগয়ী করিয়া প্রতারণা,
 কহিলা, “হা ! এ কি বিড়ম্বনা ।
 জানি সে পশুরে আমি,
 বনে পশুকূলে স্বামী,
 শাদ্দুলে, সিংহেরে নাশে,
 দক্ষে বন বিষম্বাসে ;

একমাত্র কেবল উপায় ;—
 মুখস ও মুখে পর,
 পৃষ্ঠে চর্ম্মাসিন ধর,
 আমি সে আসনে বসি,
 করে ধনুর্বার্ণ অসি,
 তা হলে বিজয় লভা যায় ॥”

১০

হায়! ক্রোধে অন্ধ অশ্ব, কুছলে তুলিল ;
 লাফে পৃষ্ঠে দুষ্ট সাদী অমনি চড়িল ।
 লোহার কণ্টকে গড়া অস্ত্র, বাঁধা পাদুকায়,
 তাহার আঘাতে প্রাণ যায় ।
 মুখস নাশিল গতি, ভয়ে হয় ক্ষিপ্তমতি,
 চলে সাদী যে দিকে চালায় ॥

১১

কোথা অরি, কোথা বন,
 সে সুখের নিকেতন ?
 দিনান্তে হইলা বন্দী আঁধার-শালায় ।
 পরের অনিষ্ট হেতু ব্যগ্র যে দুশ্মতি,
 এই পুরস্কার তার কহেন ভারতী ;
 ছায়া সম জয় যায় ধর্ম্মের সংহতি ॥

দেবদৃষ্টি

শচী সহ শচীপতি স্বর্ণ-মেঘাসনে,
 বাহিরিলা বিশ্ব দরশনে ।
 অরোহি বিচিত্র রথ,
 চলে সঙ্গে চিত্ররথ,
 নিজদলে বিমণ্ডিত অস্ত্র আভরণে,
 রাজাজ্জায় আশুগতি বহিলা বাহনে ।
 হেরি নানা দেশ সুখে,
 হেরি বহু দেশ দুঃখে—
 ধর্ম্মের উন্নতি কোন স্থলে ;
 দেব অগ্রগতি বঙ্গে উতরিল ।
 কহিলা মাহেন্দ্রে সতী শচী সুলোচনা,
 কোন দেশে এবে গতি,
 কহ হে প্রাণের পতি,
 এ দেশের সহ কোন দেশের তুলনা ?

উত্তরিলা মধুর বচনে
 বাসব, লো চন্দ্রাননে,
 বঙ্গ এ দেশের নাম বিখ্যাত জগতে ।
 ভারতের প্রিয় মেয়ে
 মা নাই তাহার চেয়ে
 নিত্য অলঙ্কৃত হীরা, মুক্তা, মরকতে ।
 সন্নেহে জাহ্নবী তারে
 মেখলেন চারি ধারে
 বরুন্ ধোয়েন পা দু'খানি ।

নিত্য রক্ষকের বেশে
 হিমাড্রি উত্তর দেশে
 পরেশনাথ আপনি
 শিরে তার শিরোমণি
 সেই এই বঙ্গভূমি শুন লো ইন্দ্রাণি !
 দেবাদেশে আশুগতি
 চলিলেন মৃদুগতি
 উঠিল সহসা ধ্বনি
 সভয়ে শচী অমনি ইন্দ্রের সুধিলা,—
 নীচে কি হতেছে রণ
 কহ সখে বিবরণ
 হেন দেশে হেন শব্দ কি হেতু জন্মিলা ?
 চিত্ররথ হাত জোড় করি
 কহে, শুন ত্রিদিব-ঈশ্বরি !
 ‘বিবাহ করিয়া এক বালক যাইছে,
 ‘পত্নী আসে দেখ তার পিছে’
 সুধাংশুর অংশুরূপে নয়ন-কিরণ
 নীচদেশে পড়িল তখন ।

গদা ও সদা

গদা সদা নামে
 কোন এক গ্রামে
 ছিল দুই জন ।
 দূর দেশে যাইতে হইল ;
 দুজনে চলিল ।
 ভয়ানক পথ—পাশে পশু ফণী বন,
 ভল্লুক শাদ্দুল তাহে গর্জে অনুক্ষণ ।
 কালসর্প যেমতি বিবরে,
 তঙ্কর লুকায়ে থাকে গিরির গহুরে
 পথিকের অর্থ অপহরে,
 কখন বা প্রাণনাশ করে ।

কহে সদা গদারে আহ্বানি
 কর কিরা পর্শি মোর পাণি
 ধর্ম্মে সাক্ষী মানি,
 আজ হতে আমরা দুজন
 হ'নু একপ্রাণ একমন,—
 সুন্দ উপসুন্দ যথা—জান সে কাহিনী।
 আমার মঙ্গল যাহে,
 তোমার মঙ্গল তাহে,
 কবচে ভেদিলে বাণ, বক্ষ ক্ষত যথা,
 অমঙ্গলে অমঙ্গল উভয়ের তথা।
 কহে গদা ধর্ম্ম সাক্ষী করি,
 কিরা মোর ভব কর ধরি,
 একায়া আমরা দৌহে কি বাঁচি কি মরি!
 এইরূপে মৈত্র আলাপনে
 মনানন্দে চলিলা দুজনে।
 সতর্ক রক্ষকরূপে সদা গদা যেন
 বন পাশে একদৃষ্টে চাহে অনুক্ষণ,
 পাছে পশু সহসা করয়ে আক্রমণ।
 গদা চারি দিকে চায়,
 এরূপে উভয়ে যায় ;
 দেখে গদা সম্মুখে চাহিয়া
 থল্যে এক পথেতে পড়িয়া।
 দৌড়ে মুঢ় থল্যে তুলি
 হেরে কুতূহলে খুলি
 পূর্ণ থল্যে সুবর্ণমুদ্রায়,
 তোলা ভার, এত ভারি তায়।
 কহে গদা সহাস বদনে
 করেছিলু যাত্রা আজি অতি শুভ ক্ষণে
 আমরা দুজনে।
 'দুজনে?' কহিল সদা রাগে,
 'লোভে কি করিস্ তুই এ অর্থের ভাগে ?
 মোর পূর্ব পুণ্যফলে
 ভাগ্যদেবী এই ছলে
 মোরে অর্থ দিলা।
 পাপী তুই, অংশ তোরে
 কেন দিব, ক' তা মোরে
 এ কি বাললীলা ?
 রবির করের রাশি পরশি রতনে
 বরাস্কের আভা তার বাড়ায় যতনে ;
 কিন্তু পড়ি মাটির উপরে
 সে কর কি কোন ফল ধরে ?
 সৎ যে তাহার শোভা ধনে,

অসৎ নিতান্ত তুই, জনম কুক্ষণে।'
 এই কয়ে সদানন্দ থল্যে তুলে লয়ে
 চলিতে লাগিলা সুখে অগ্রসর হয়ে।
 বিস্ময়ে অবাক্ গদা চলিল পশ্চাতে,—
 বামন কি কভু পায় চারু চাঁদে হাতে ?
 এই ভাবি অতি ধীরে ধীরে
 গেল গদা তিতি অশ্রুণীরে।
 দুই পাশে শৈলকুল ভীষণ-দর্শন,
 শৃঙ্গ যেন পরশে গগন।
 গিরিশিরে বরষায় প্রবলা যেমতি
 ভীমা শ্রোতস্বতী,
 পথিক দুজনে হেরি তস্করের দল
 নাবি নীচে করি কোলাহল
 উভে আক্রমিল।
 সদা অতি কাতরে কহিল,—
 শুন ভাই, পঞ্চালে যেমতি,
 বিষুে রথিপতি,
 জিনি লক্ষ রাজে শুর কৃষ্ণায় লভিলা,
 মার চোরে করি রণ-লীলা।
 হিসাবে করিয়া আঁটাআঁটি,
 এই ধন নিও পরে বাঁটি
 তস্করদলের মাথা কাটি।
 কহে গদা, পাপী আমি, তুমি সংজন,
 ধর্ম্মবলে নিজধন করহ রক্ষণ।
 তস্কর-কুল-ঈশ্বরে
 কহিল সে যোড় করে,
 অধিপতি ওই জন ভাই,
 সঙ্গী মাত্র আমি ওর, ধর্ম্মের দোহাই।
 সঙ্গী মাত্র যদি তুই, যা চলি বর্কর,
 নতুবা ফেলিব কাটি, কহিল তস্কর।
 ফাঁদে বাঁধা পাবী যথা পাইলে মুকতি
 উড়ি যায় বায়ুপথে অতি দ্রুতগতি,
 গদা পলাইল।
 সদানন্দ নিরানন্দে বিপদে পড়িল।
 আলোক থাকিতে তুচ্ছ কর তুমি যারে,
 বঁধু কি তোমার কভু হয় সে আঁধারে ?
 এই উপদেশ কবি দিলা এ প্রকারে।

কুক্কট ও মণি

খুঁটিতে খুঁটিতে ক্ষুদ্র কুক্কট পাইল
 একটি রতন ;—

বণিকে সে ব্যগ্র জিজ্ঞাসিল ;—
 “ঠোঁটের বলে না টুটে, এ বস্তু কেমন ?”
 বণিক্ কহিল, — “ভাই,
 এ হেন অমূল্য রত্ন, বুঝি, দুটি নাই !”
 হাসিল কুক্কট শূনি ;— “তথুলের কণা
 বহুমূল্যতর ভাবি ;— কি আছে তুলনা ?”
 “নহে দোষ তোর, মুঢ়, দৈব এ ছলনা,
 জ্ঞান-শূন্য করিল গৌসাই !”—
 এই কয়ে বণিক ফিরিল ।
 মুৰ্খ যে, বিদ্যার মূল্য কতু কি সে জানে ?
 নর-কূলে পশু বলি লোকে তারে মানে ;—
 এই উপদেশ কবি দিলা এই ভানে ।

সূর্য ও মৈনাক-গিরি

উদয়-অচলে,
 দিবা-মুখে এক-চক্রে দিলা দরশন,
 অংশু-মালা গলে,
 বিতরি সুবর্ণ-রশ্মি চৌদিকে তপন ।
 ফুটিল কমল-জলে
 সূর্যমুখী সুখে স্থলে,
 কোকিল গাইল কলে,
 আমোদি কানন ।
 জাগে বিশ্বে নিদ্রা ত্যজি বিশ্বাসী জন ;
 পুনঃ যেন দেব শপ্তা সৃজিলা মহীরে ;
 সজীব হইলা সবে জননি, অচিরে ।
 অবহেলি উদয়-অচলে,
 শূন্য-পথে রথবর চলে ;
 বাড়িতে লাগিল বেলা,
 পদ্মের বাড়িল খেলা,
 রজনী তারার মেলা সর্বত্র ভাসিল ;—
 কর-জালে দশ দিক্ হাসি উজ্জলিল ।
 উঠিতে লাগিলা ভানু নীল নভঃস্থলে ;
 দ্বিতীয়-তপন-রূপে নীল সিদ্ধু-জলে
 মৈনাক ভাসিল ।
 কহিল গভীরে শৈল দেব দিবাকরে ;—
 “দেখি তব ধীর গতি দুখে আঁধি ঝরে ;
 পাও যদি কষ্ট, — এস, পৃষ্ঠাসন দিব ;
 যেখানে উঠিতে চাও, সবলে তুলিব ।”
 কহিলা হাসিয়া ভানু ;— “তুমি শিষ্টমতি ;
 দৈববলে বলী আমি, দৈববলে গতি ।”

মধ্যাকাশে শোভিল তপন,—
 উজ্জ্বল-যৌবন, প্রচণ্ড-কিরণ ;
 তাপিল উত্তাপে মহী ; পবন বহিলা
 আশুনের শ্বাস-রূপে ; সব শুকাইলা—
 শুকাল কাননে ফুল ;
 প্রাণিকুল ভয়াকুল ;
 জলের শীতল দেহ দহিয়া উঠিল ;
 কমলিনী কেবল হাসিল !
 হেন কালে পতনের দশা,
 আ মরি ! সহসা
 আসি উতরিল ;—
 হিরণ্ময় রাজাসন ত্যজিতে হইল !
 অধোগামী এবে রবি,
 বিষাদে মলিন-ছবি,
 হেরি মৈনাকেরে পুনঃ নীল সিদ্ধু-জলে,
 সম্ভাষি কহিলা কতুহলে ;—
 “পাইতেছি কষ্ট, ভাই, পূর্বাসন লাগি ;
 দেহ পৃষ্ঠাসন এবে, এই বর মাগি ;
 লও ফিরে মোরে, সখে, ও মধ্য-গগনে ;—
 আবার রাজত্ব করি, এই ইচ্ছা মনে ।”
 হাসি উত্তরিল শৈল ;— “হে মুঢ় তপন,
 অধঃপাতে গতি যার কে তার রক্ষণ !
 রমার থাকিলে কৃপা, সবে ভালবাসে ;—
 কাঁদ যদি, সঙ্গে কাঁদে ; হাস যদি, হাসে ;
 ঢাকেন বদন যবে মাধব-রমণী,
 সকলে পলায় রড়ে, দেখি যেন ফণী ।”

মেঘ ও চাতক

উড়িল আকাশে মেঘ গরজি ভৈরবে ;—
 ভানু পলাইল ত্রাসে ;
 তা দেখি তড়িৎ হাসে ;
 বহিল নিশ্বাস ঝড়ে ;
 ভাঙ্গে তবু মড়-মড়ে ;
 গিরি-শিরে চূড়া নড়ে,
 যেন ভূ-কম্পনে ;
 অধীরা সভয়ে ধরা সাধিলা বাসবে ।
 আইল চাতক-দল,
 মাগি কোলাহলে জল—
 “তৃষায় আকুল মোরা, ওহে ঘনপতি !
 এ জ্বালা জুড়াও, প্রভু, করি এ মিনতি ।”
 বড় মানুষের ঘরে ব্রতে, কি পরবে,
 ভিখারী-মণ্ডল যথা আসে ঘোর রবে ;—

কেহ আসে, কেহ যায় ;
কেহ ফিরে পুনরায়
আবার বিদায় চায় ;
ব্রহ্ম লোভে সবে ;—
সেরূপে চাতক-দল,
উড়ি করে কোলাহল ;—

“তুষায় আকুল মোরা, ওহে ঘনপতি !
এ জ্বালা জুড়াও জলে, করি এ মিনতি ।”

রোষে উত্তরিলা ঘনবর ;—

“অপরে নির্ভর যার অতি সে পামর !

বায়ু-রূপ দ্রুত রথে চড়ি,
সাগরের নীল পায়ে পড়ি,
আনিয়াছি বারি ;

ধরার এ ধার ধারি ।

এই বারি পান করি,

মেদিনী সুন্দরী

বৃক্ষ-লতা-শস্যচয়ে

স্তন-দুগ্ধ বিতরণে

শিশু যথা বল পায়,

সে রসে তাহারা খায়,

অপরূপ রূপ-সুখা বাড়ে নিরন্তর ;

তাহারা বাঁচায়, দেখ, পশু-পক্ষী-নর ।

নিজে তিনি হীন-গতি ;

জল গিয়া আনিবারে নাহিক শক্তি ;

তেঁই তাঁর হেতু বারি-ধারা ।—

তোমরা কাহারা ?

তোমাদের দিলে জল,

কভু কি ফলিবে ফল ?

পাখা দিয়াছেন বিধি ;

যাও, যথা জলনিধি ;—

যাও, যথা জলাশয় ;—

নদ-নদী-তড়াগাদি, জল যথা রয় ।

কি গ্রীষ্ম, কি শীত কালে,

জল যেখানে পালে,

সেখানে চলিয়া যাও, দিনু এ যুকতি ।”

চাতকের কোলাহল অতি ।

ক্রোধে তড়িতেরে ঘন কহিলা,—

“অগ্নি-বাণে তাড়াও এ দলে ।”—

তড়িৎ প্রভুর আঞ্জা মানিলা ।

পলায় চাতক, পাখা জ্বলে ।

যা চাহ, লভ সদা নিজ পরিশ্রমে ;

এই উপদেশ কবি দিলা এই ক্রমে ।

পীড়িত সিংহ ও অন্যান্য পশু

অধিক-বয়স-ভরে হয়ে হীন-গতি,

সিংহ কুশ অতি ।

জনরব-রূপ-শ্রোতে,

ভাসাল ঘোষণা-পোতে,

এই কথা ;—“মৃগরাজ মগ্ন রাজকাজে ;

প্রজাবর্গ, রাজপুরে পূজ কুল-রাজে ।”

প্রভু-ভক্তি-মদে মাতি

কুরঙ্গ, তুরঙ্গ, হাতী,

করে করি রাজকর,

পালা-মতে নিরন্তর,

গেলা চলি রাজ-নিকেতনে,

অতি হৃষ্ট মনে ।

শৃগাল-কুলের পালা আসি উতরিল ;

কুল-মন্ত্রী সভা আহানিল ;

কি ভেট, কি উপহার,

কি পানীয়, কি আহার,—

এই লয়ে ঘোর তর্ক-বিতর্ক হইল ।

হেন কালে আর মন্ত্রী সহাসে কহিল ;—

“তর্কের যে অলঙ্কার তোমরা সকলে,—

এ বিশ্বে এ বিশ্ব-জনে বলে ;

কিস্ত কহ দেখি, শুনি, কেন স্থানে-স্থানে

বহুবিধ পদ-চিহ্ন রাজ-গৃহ-পানে ?—

ফিরে যে আসিছে, তার চিহ্ন কে মুছিল ?”

চতুর যে সর্কর্দর্শী, বিপদের জালে

পদ তার পড়িতে পারে কোন্ কালে ?

সিংহ ও মশক

শঙ্খনাদ করি মশা সিংহে আক্রমিল ;

ভব-তলে যত নর,

ত্রিদিবে যত অমর,

আর যত চরাচর,

হেরিতে অদ্ভুত যুদ্ধ দৌড়িয়া আইল ।

হল-রূপ শূলে বীর, সিংহেরে বিধিল ।

অধীর ব্যথায় হরি,

উচ্চ-পুচ্ছে ক্রোধ করি,

কহিলা ;—“কে তুই, কেন

বৈরিভাব তোর হেন ?

গুণ্ডভাবে কি জন্য লড়াই ?—

সম্মুখ সমর কর, তাই আমি চাই ।

দেখিব বীরত্ব কত দূর,
 আঘাতে করিব দৰ্প-চূর ;
 লক্ষ্মণের মুখে কালি
 ইন্দ্রজিতে জয় ডালি,
 দিয়াছে এ দেশে কবি।”
 কহে মশা ;—“ভীৰু, মহাপাপি,
 যদি বল থাকে, বিষম-প্রতাপি,
 অন্যায়-ন্যায়-ভাবে,
 ক্ষুধায় যা পায়, খাবে ;
 ধিক্, দুষ্টমতি !
 মারি তোরে বন-জীবে দিব, রে, কু-মতি।”
 হইল বিষম রণ, তুলনা না মিলে ;
 ভীম দুৰ্য্যোধনে,
 ঘোর গদা-রণে,
 হ্রদ বৈপায়নে,
 তীরস্থ সে রণ-ছায় পড়িল সলিলে ;
 ডরাইয়া জল-জীবী জল-জন্তুচয়ে,
 সভয়ে মনেতে ভাবিল,

প্রলয়ে বুঝি এ বীরেন্দ্র-দ্বয় এ সৃষ্টি নাশিল।

মেঘনাদ মেঘের পিছনে,
 অদৃশ্য আঘাতে যথা রণে ;
 কেহ তারে মারিতে না পায়,
 ভয়ঙ্কর স্বপ্নসম আসে,—এসে যায়
 জর-জরি শ্রীরামের কটক লঙ্কায়।
 কভু নাকে, কভু কাণে,
 ত্রিশূল-সদৃশ হানে
 ছল, মশা বীর।
 না হেরি অরিরে হরি,
 মুহুমুহুঃ নাদ করি,
 হইলা অধীর।

হায়! ক্রোধে হৃদয় ফাটিল ;—
 গত-জীব মৃগরাজ ভূতলে পড়িল !
 ক্ষুদ্র শত্রু ভাবি লোক অবহেলে যারে,
 বহুবিধ সঙ্কটে সে ফেলাইতে পারে ;—
 এই উপদেশ কবি দিলা অলঙ্কারে।

সনেট ও সনেটকল্প কবিতা

কবি-মাতৃভাষা

নিজাগারে ছিল মোর অমূল্য রতন
 অগণ্য ; তা সবে আমি অবহেলা করি,
 অর্থলোভে দেশে দেশে করিনু ভ্রমণ,
 বন্দরে বন্দরে যথা বাণিজ্যের তরী।
 কাটাইনু কত কাল সুখ পরিহরি,
 এই ব্রতে, যথা তপোবনে তপোধন,
 অশন, শয়ন ত্যজে, ইস্টদেবে স্মরি,
 তাঁহার সেবায় সদা সঁপি কায় মন।
 বঙ্গকুল-লক্ষ্মী মোরে নিশার স্বপনে
 কহিলা—“হে বৎস, দেখি তোমার ভকতি,
 সুপ্রসন্ন তব প্রতি দেবী সরস্বতী !
 নিজ গৃহে ধন তব, তবে কি কারণে
 ভিখারী তুমি হে আজি, কহ ধন-পতি ?
 কেন নিরানন্দ তুমি আনন্দ-সদনে ?”

ঢাকাবাসীদের অভিনন্দনের উত্তরে

নাহি পাই নাম তব বেদে কি পুরাণে
 কিন্তু বঙ্গ-অলঙ্কার তুমি যে তা জানি

পূর্ব-বঙ্গে। শোভ তুমি এ সুন্দর স্থানে
 ফুলবৃন্তে ফুল যথা, রাজাসনে রাণী।
 প্রতি ঘরে বাঁধা লক্ষ্মী (থাকে এইখানে)
 নিত্য অতিথিনী তব দেবী বীণাপাণি।
 পীড়ায় দুর্বল আমি, তেঁই বুঝি আনি
 সৌভাগ্য, অপীলা মোরে (বিধির বিধানে)
 তব করে, হে সুন্দরি। বিপজ্জাল যবে
 বেড়ে কারে, মহৎ যে সেই তার গতি।
 কি হেতু মৈনাক গিরি ডুবিলা অর্ণবে ?
 দ্বৈপায়ন হ্রদতলে কুরুকুলপতি ?
 যুগে যুগে বসুন্ধরা সাধেন মাধবে,
 করিও না ঘৃণা মোরে, তুমি, ভাগ্যবতি !

পুরুলিয়া

পাষণময় যে দেশ, সে দেশে পড়িলে
 বীজকুল, শস্য তথা কখন কি ফলে ?
 কিন্তু কত মনানন্দ তুমি মোরে দিলে,
 হে পুরুল্যে ! দেখাইয়া ভকত-মণ্ডলে।
 শ্রীলঙ্ক সরস সম, হায়, তুমি ছিলে,
 অজ্ঞান-তিমিরাচ্ছন্ন এ দূর জঙ্গলে ;

এবে রাশি রাশি পদ্ম ফোটে তব জলে,
পরিমল-ধনে ধনী করিয়া অনিলে!
প্রভুর কি অনুগ্রহ! দেখ ভাবি মনে,
(কত ভাগ্যবান তুমি কব তা কাহারে?)
রাজ্যসন দিলা তিনি ভূপতিত জনে!
উজ্জলিলা মুখ তব বঙ্গের সংসারে;
বাড়ুক সৌভাগ্য তব এ প্রার্থনা করি,
ভাসুক সভ্যতা-স্রোতে নিত্য তব তরি।

পরেশনাথ গিরি

হেরি দূরে উদ্ধৃশিরঃ তোমার গগনে,
অচল, চিত্রিত পটে জীমূত যেমতি।
ব্যোমকেশ তুমি কি হে, (এই ভাবি মনে)
মজি তপে, ধরেছ ও পাষণ-মুরতি?
এ হেন ভীষণ কায়ার বিশ্বজনে?
তবে যদি নহ তুমি দেব উমাপতি,
কহ, কোন্ রাজবীর তপোব্রতে ব্রতী—
খচিত শিলার বর্ষ্ম কুসুম-রতনে
তোমার? যে হর-শিরে শশিকলা হাসে,
সে হর কিরীটরূপে তব পুণ্য শিরে
চিরবাসী, যেন বাঁধা চিরপ্রেমপাশে।
হেরিলে তোমায় মনে পড়ে ফাঙ্কুনিরে
সেবিলা বীরেশ যবে পাশুপত আশে
ইন্দ্রকীল নীলচূড়ে দেব ধূর্জটিরে।

কবির ধর্মপুত্র

(শ্রীমান্ ব্রীষ্টদাস সিংহ)

হে পুত্র, পবিত্রতর জনম গৃহিলা
আজি তুমি, করি স্নান যর্দনের নীরে
সুন্দর মন্দির এক আনন্দে নিশ্চিলা
পবিত্রাশ্রা বাস হেতু ও তব শরীরে;
সৌরভ কুসুমে যথা, আসে যবে ফিরে
বসন্ত, হিমাস্তকালে। কি ধন পাইলা—
কি অমূল্য ধন বাছ, বুঝিবে অচিরে,
দৈববলে বলী তুমি, শুন হে, হইলা!
পরম সৌভাগ্য তব। ধর্ম বর্ষ্ম ধরি
পাপ-রূপ রিপু নাশে এ জীবন-স্থলে
বিজয়-পতাকা তোলাি রথের উপরি;
বিজয় কুমার সেই, লোকে যারে বলে
ব্রীষ্টদাস, লভো নাম, আশীর্বাদ করি,
জনক জননী সহ, প্রেম কুতূহলে!

মধু—১৪

পঞ্চকোট গিরি

কাটিলা মহেন্দ্র মর্ন্ত্যে বজ্র প্রহরণে
পর্কতকুলের পাখা; কিন্তু হীনগতি
সে জন্য নহ হে তুমি, জানি আমি মনে,
পঞ্চকোট! রয়েছ যে,—লঙ্কায় যেমতি
কুস্তকর্ণ,—রক্ষ, নর, বানরের রণে—
শূন্যপ্রাণ, শূন্যবল, তবু ভীমাকৃতি,—
রয়েছ যে পড়ে হেথা, অন্য সে কারণে।
কোথায় সে রাজলক্ষ্মী, যাঁর স্বর্ণ-জ্যোতি
উজ্জ্বলিত মুখ তব? যথা অন্তাচলে
দিনান্তে ভানুর কান্তি। তেয়াগি তোমায়
গিয়াছেন দূরে দেবী, তেঁই হে! এ স্থলে,
মনোদুঃখে মৌন ভাব তোমার; কে পারে
বুঝিতে, কি শোকানল ও হৃদয়ে জ্বলে?
মণিহারা ফণী তুমি রয়েছ আঁধারে।

পঞ্চকোটস্য রাজশ্রী

হেরিনু রমারে আমি নিশার স্বপনে;
হাটু গাড়ি হাতী দুটি শুঁড়ে শুঁড়ে ধরে—
পদ্মাসন উজ্জলিত শতরত্ন-করে,
দুই মেঘরাশি-মাঝে, শোভিছে অম্বরে,
রবির পরিধি যেন। রূপের কিরণে
আলো করি দশ দিশ; হেরিনু নয়নে,
সে কমলাসন-মাঝে ভূলাতে শঙ্করে
রাজরাজেশ্বরী, যেন কৈলাস-সদনে।
কহিলা বাগদেবী দাসে (জননী যেমতি
অবোধ শিশুরে দীক্ষা দেন প্রেমাধরে),
“বিবিধ আছিল পুণ্য তোর জন্মান্তরে,
তেঁই দেখা দিলা তোরে আজি হৈমবতী
যেরূপে করেন বাস চির রাজ-ঘরে
পঞ্চকোট;—পঞ্চকোট—ওই গিরিপতি।”

পঞ্চকোট-গিরি বিদায়-সঙ্গীত

হেরেছিলি, গিরিবর! নিশার স্বপনে,
অদ্ভুত দর্শন!
হাটু গাড়ি হাতী দুটি শুঁড়ে শুঁড়ে ধরে,
কনক-আসন এক, দীপু রত্ন-করে
দ্বিতীয় তপন!

যেই রাজকুলখ্যাতি তুমি দিয়াছিলি,
সেই রাজকুললক্ষ্মী দাসে দেখা দিলা,
শোভি সে আসন!
হে সখে! পাষণ তুমি, তবু তব মনে
ভাবরূপ উৎস, জানি, উঠে সর্বক্ষণে।
ভেবেছিলি, গিরিবর। রমার প্রসাদে,
তঁর দয়াবলে,
ভাঙা গড় গড়াইব, জলপূর্ণ করি
জলশূন্য পরিখায়; ধনুর্কর্ণ ধরি দ্বারিগণ
আবার রক্ষিবে দ্বার অতি কুতূহলে।

হাতাশা-পীড়িত হৃদয়ের দুঃখধ্বনি

ভেবেছিলি মোর ভাগ্য, হে রমাসুন্দরি,
নিবাইবে সে রোষাঙ্গি,—লোকে যাহা বলে,
হাসিতে বাণীর রূপ তব মনে জ্বলে;—
ভেবেছিলি, হায়! দেখি, ভ্রান্তিভাব ধরি!
ডুবাইছ, দেখিতেছি, ক্রমে এই তরী
অদয়ে, অতল দুঃখ-সাগরের জলে
ডুবিনু; কি যশঃ তব হবে বঙ্গ-স্থলে?

কোন বন্ধুর প্রতি

এ ধরার কর্মভার মন বেদনিলে,
কার করপদ্ম-স্পর্শে সারে সে বেদনা
বরদার দয়াসম? হাত বুলাইলে,
জননী, ব্যথিত দেহে, কোথা ব্যথা থাকে?
এ কথা তোমার কাছে অবিদিত নহে।

জীবিতাবস্থায় অনাদৃত কবিগণের সম্বন্ধে

ইতিহাস এ কথা কাঁদিয়া সদা বলে,
জন্মভূমি ছেড়ে চল যাই পরদেশে।
উরুপায় কবিগুরু ভিখারী আছিলি
ওমর (অসভ্যকালে জন্ম তাঁর) যথা
অমৃত সাগরতলে। কেহ না বুঝিল
মূল্য সে মহামণির; কিন্তু যম যবে

গ্রাসিল কবির দেহ, কিছু কাল পরে
বাড়িল কলহ নানা নগরে; কহিল
এ নগর ও নগরে, “আমার উদরে
জনম গ্রহিয়াছিলি ওমর সুমতি।”
আমাদের বাস্মীকির এ দশা; কে জানে,
কোন কূলে কোন স্থানে জন্মিলা সুমতি।

পণ্ডিতবর

শ্রীযুক্ত ঈশ্বরচন্দ্র বিদ্যাসাগর

শুনেছি লোকের মুখে পীড়িত আপনি
হে ঈশ্বরচন্দ্র! বঙ্গে বিখাতার বরে
বিদ্যার সাগর তুমি; তব সম মণি,
মলিনতা কেন কহ চাকে তার করে?
বিধির কি বিধি সূরি, বুঝিতে না পারি,
হেন ফুলে কীট কেন পশিবারে পারে?
করমনাশার স্রোত অপবিত্র বারি
ঢালি জাহ্নবীর গুণ কি হেতু নিবारे?
বঙ্গের সুচুড়ামণি করে হে তোমারে
সৃজিলা বিখাতা, তোমা জানে বঙ্গজনে;
কোন পীড়ারূপ অরি বাণাঘাতে পারে
বঁধিতে, হে বঙ্গরত্ন; এ হেন রতনে?
যে পীড়া ধনুক ধরি হেন বাণ হানে
(রাক্ষসের রূপ ধরি), বুঝিতে কি পার,
বিদীর্ণ বঙ্গের হিয়া সে নিষ্ঠুর বাণে?
কবিপুত্র সহ মাতা কাঁদে বারম্বার।

সমাধি-লিপি

দাঁড়াও, পথিক-বর, জন্ম যদি তব
বঙ্গে! তিষ্ঠ ক্ষণকাল! এ সমাধিস্থলে
(জননীর কোলে শিশু লভয়ে যেমতি
বিরাম) মহীর পদে মহানিদ্রাবৃত
দন্তকুলোদ্ভব কবি শ্রীমধুসূদন!
যশোরে সাগরদাঁড়ী কবতক্ষ-তীরে
জন্মভূমি, জন্মদাতা দন্ত মহামতি
রাজনারায়ণ নামে, জননী জাহ্নবী!

অসমাপ্ত কবিতা

ব্রজাঙ্গনা কাব্য

অসম্পূর্ণ দ্বিতীয় সর্গ

বিহার

১

সাজ, সাজ ব্রজাঙ্গনে, রঙ্গে ঘুরা করি ।
মণি, মুক্তা পর কেশে
মেখলা লো কটিদেশে,
বাঁধ লো নুপুর পায়ে, কুসুমে কবরী ॥
লেপ সুচন্দন দেহে,
কি সাথে রহিবে গেহে ?
ওই শুন, পুনঃ পুনঃ বাজিছে বাঁশরী ॥

২

নাচিছে লো নিতম্বিনি, কদম্বের তলে ।
'শিখণ্ড-মণ্ডিত-শির',
ধীরে ধীরে শ্যাম ধীর,
দুলিছে লো, বরগুঞ্জমালা বর-গলে ।
মেঘ সনে সৌদামিনী—
সম রূপে, লো কামিনি,
ঝলে পীতধড়া-রূপে ঝল ঝল ঝলে ॥

৩

হৃদে কুমুদিনী এবে প্রফুল্ল ললনে,
তব আশা-শশী আসি,
শোভিছে নিকুঞ্জে হাসি,
কোন্ মৌনরতে তুমি শূন্য নিকেতনে ॥
দেব-দৈত্য মিলি বলে,
মথিলা সাগর-জলে,^১
যে সুধার লোভে, তাহা লভিবে সুন্দরি !
সুধামাখা বিশ্বাধরে,^২
আছে সুধা তব তরে,
যাও নিতম্বিনি, তুমি অবিলম্বে বনে !

বীরাঙ্গনা কাব্য

[বীরাঙ্গনা কাব্যের দ্বিতীয় খণ্ডের জন্য কবি কয়েকটি পত্র-কবিতা লিখতে আরম্ভ করেছিলেন। কিন্তু শেষ করতে পারেন নি। সেগুলি এখানে সন্নিবিষ্ট হল। সম্পাদক।]

ধৃতরাষ্ট্রের প্রতি গান্ধারী

জন্মান্ত নৃমণি ! তুমি এ বারতা পেয়ে
দূতমুখে, অন্ধ হ'লো গান্ধারী কিঙ্করী
আজি হ'তে। পতি তুমি ; কি সাথে ভূঞ্জিব
সে সুখ, যে সুখভোগে বঞ্চিলা বিধাতা
তোমারে, হে প্রাণেশ্বর ! আনিতেছে দাসী
কাপড়, ভাঁজিয়া^১ তাহে, সাত বার বেড়ি
অন্ধিব^২ এ চক্ষু দুটি কঠিন বন্ধনে,
ভেজাইব দৃষ্টি-দ্বারে কবাট। ঘটিল,
লিখিলা বিধি যা ভালে—আক্ষেপ না করি ;
করিলে, ত্যজিব কেন রাজ-অট্টালিকা ;
যাইতে যথায় তুমি দূর হস্তিনাতে ?
দেবাদেশে নরবর বরেছি তোমারে ।

* * * *

আর না হেরিবে কভু দেব বিভাবসু
তব বিভারামি^৩ দাসী এ ভবমণ্ডলে ;
তুমিও বিদায় কর, হে রোহিণীপতি^৪,
চাকু চন্দ্র ; তারাবন্দ তোমরা গো সবে ।
আর না হেরিব কভু সখীদলে মিলি
প্রদোষে তোমা সকলে, রশ্মিবিশ্ব যেন
অম্বরসাগরে, কিন্তু স্থিরকান্তি ; যবে
বহেন মলয়ানিল গহন বিপিনে
বাসুকির ফণারূপ পর্যাঙ্কে^৫ সুন্দরী—।
বসুন্ধরা, যান নিদ্রা নিঃশ্বাসি সৌরভে ।
হে নদ তরঙ্গময়, পবনের রিপু^৬
(যবে ঝড়াকারে তিনি আক্রমেন তোমা)
হে নদি, পবনপ্রিয়া, সুগন্ধের সহ
তোমার বদন আসি চুখেন পবন,

১. শিখণ্ড-মণ্ডিত-শির—ময়ূর পুচ্ছ শোভিত মাথা

২. পুরাণ প্রসঙ্গ ৩. লাল ঠোঁট ৪. ভাঁজ করিয়া

৫. অন্ধ করিব ৬. বিভা—কিরণ ৭. চন্দ্র

৮. ষাট ৯. শত্রু

হে উৎস গিরি-দুহিতা জননী মা তুমি ;
নদ, নদী, আশীর্বাদ কর এ দাসীরে ।
গাঙ্কার-রাজনন্দিনী অঙ্কা হলো আজি ।
আর না হেরিবে কভু হায় অভাগিনী
তোমাদের প্রিয়মুখ । হে কুসুমকুল,
ছিনু তোমাদের সখী, ছিনু লো ভগিনী,
আজি স্নেহহীন হয়ে ছাড়িনু সবারে ;
স্নেহহীন এ কি কথা ? ভুলিতে কি পারি ?
তোমা সবে ? স্মৃতিশক্তি যত দিন রবে
এ দেহে, স্মরিব আমি তোমা সবাকারে ।

অনিরুদ্ধের প্রতি উষা

বাণ-পুরাধিপ বাণ-দানব-নন্দিনী
উষা, কৃতাঞ্জলিপুটে নমে তব পদে,
যদুবর !^{১০} পত্রবাহ চিত্রলেখা সখী—
দেখা যদি দেহ, দেব, কহিবে বিরলে ।
প্রাণের রহস্যকথা প্রাণের ঈশ্বরে !

অকুল পাথারে নাথ, চিরদিন ভাসি
পাইয়াছি কুল এবে । এত দিনে বিধি
দিয়াছেন দিন আজি দীন অধীনীরে !
কি কহিনু ? ক্ষম দেব, বিবশা এ দাসী
হরষে, সরসে যথা হাসে কুমুদিনী,
হেরিয়া আকাশদেশে দেব নিশানাথে
চিরবাণী ; চাতকিনী কুতুকিনী যথা
মেঘের সুশ্যাম মূর্তি হেরি শূন্যপথে ।
তেমতি এ পোড়া প্রাণ নাচিছে পুলকে,
আনন্দজনিত জল বহিছে নয়নে ।
দিয়াছি আদেশ নাথ সঙ্গিনী-সমূহে,
গাইছে মধুর গীত, মিলি তারা সবে
বাজায়ে বিবিধ যন্ত্র । উষার হৃদয়ে
আশালতা আজি উষা রোপিবে কৌতুকে
শুন এবে কহি দেব, অপূর্ব কাহিনী ।

যযাতির প্রতি শশ্বিষ্ঠা

দৈত্যকুল-রাজবালা শশ্বিষ্ঠা সুন্দরী
বলিতে সোহাগে যারে, নরকুলরাজা
তুমি, হে যযাতি, আজি ভিখারিণী হ'ল,

ভবসুখে ভাগ্যদোষে দিয়া জলাঞ্জলি ।
দাবানলে দন্ধ হেরি বন-গৃহ, যথা
কুরঙ্গী শাবক সব সঙ্গে লয়ে চলে,
না জানে আবার কোথা আশ্রয় পাইবে ।
হে রাজন ! শিশুত্রয় লয়ে নিজে সাথে
চলিল শশ্বিষ্ঠা-দাসী কোথায় কে জানে
আশ্রয় পাইবে তারা ? মনে রেখ তুমি ।
নয়নের বারি পড়ি ভিজিতে লাগিল
আঁচল, বুঝিয়া তবু দেখ প্রাণপতি,
কে তুমি, কে আমি নাথ, কি হেতু আইনু
দাসীরূপে তব গৃহে রাজবালা আমি ?
কি হেতু বা থেকে গেনু তোমার সদনে,
দৈত্যকুল-রাজবালা আমি দাসীরূপে ।

নারায়ণের প্রতি লক্ষ্মী

আর কত দিন, সৌরি,^{১১} জলধির গৃহে
কাঁদিবে অধীনী রমা, কহ তা রমারে ।
না পশে, এ দেশে নাথ, রবিকররাশি,
না শোভেন সুধানিধি সুধাংশু বিতরি ;
স্থিরপ্রভা ভাবে নিত্য ক্ষণপ্রভা রূপী ।
বিভা, জন্মি রত্নজালে উজলয়ে পুরী ।
তবুও, উপেন্দ্র, আজ ইন্দ্রিয়া দুঃখিনী ।
বাম দ্যমোদর^{১২} ; তুমি লয়েছ হে কাড়ি
নয়নের মণি তার পাদপদ্ম তব ।
ধরি এ দাসীর কর ও কর-কমলে
কহিলে দাসীরে যবে হে মধুরভাষী,
“যাও প্রিয়ে, বৈনতেয় কৃতাঞ্জলিপুটে—
দেখ দাঁড়াইয়া ওই ; বসি পৃষ্ঠাসনে
যাও সিদ্ধুতীরে আজি ।” হয় । না জানিনু
হইনু বৈকুণ্ঠচ্যুত দুর্কাসার রোষে ।^{১৩}

নলের প্রতি দময়ন্তী

পঞ্চ দেবে বঞ্চি সাথে স্বয়ম্বর-স্থলে
পূজিল রাজীব-পদ তব যে কিঙ্করী,
নরেন্দ্র, বিজন বনে অর্ধ বস্ত্রাবৃত
তাজিলে তুমি হে যারে, না জানি কি দোষে,
নমে সে বৈদভী^{১৪} আজি তোমার চরণে ।

১০. যদুবংশের সন্তান বলে অনিরুদ্ধকে এ সম্বোধন করা হয়েছে

১১. বিষ্ণু ১২. বিষ্ণু ১৩. পুরাণ প্রসঙ্গ

১৪. বিদর্ভদেশের রাজকন্যা

রিজিয়া

হা বিধি, অধীর আমি। অধীর কে কবে,
 এ পোড়া মনের জ্বালা জুড়াই কি দিয়া?
 হে স্মৃতি, কি হেতু যত পূর্বকথা কয়ে,
 দ্বিগুণিছ এ আগুন, জিহ্বাসি তোমারে।
 কি হেতু লো বিষদন্ত ফণিরূপ ধরি,
 মুহুমুহঃ দংশে আজি জর্জরি হৃদয়ে?
 কেমনে, লো দুষ্টা নারি, ভুলিলি নিষ্ঠুরে
 আমায়? সে পূর্ব সত্য, অঙ্গীকার যত,
 সে আদর, সে সোহাগ, সে ভাব কেমনে
 ভুলিল ও মন তোর, কে কবে আমারে?
 হয় লো সে প্রেমাক্ষর কি তাপে শুকাল?
 এ হেন সুবর্ণ-দেহে কি সুখে রাখিলি
 এ হেন দুরন্ত আত্মা, রে দুরাত্মা বিধি!
 এ হেন সুবর্ণময় মন্দিরে স্থাপিলি
 এ হেন কু-দেবতারে তুই কি কৌতুকে?
 কোথা পাব হেন মন্ত্র যার মহাবলে
 ভুলি তোরে, ভূত কাল, প্রমত্ত যেমতি
 বিস্মরে (সুরার তেজে, যা কিছু সে করে)
 জ্ঞানোদয়ে? রে মদন, প্রমত্ত করিলি
 মোরে প্রেম মদে তুই; ভুলা তবে এবে,
 ঘটিল যা কিছু, যবে ছিনু জ্ঞান-হীনে।
 এ মোর মনের দুঃখ কে আছে বুঝিবে?
 বন্ধুমাত্র মোর তুই, চল সিদ্ধদেশে,
 দেখিব কি থাকে ভাগ্যে। হয়ত মরিব,
 এ মনান্নি নিবাহিব ঢালি লঙ্ঘ-স্রোতে,
 নতুবা, রে মৃত্যু, তোর নীরব সদনে
 ভুলিব এ মহাজ্বালা—দেখিব কি ঘটে।
 কি কাজ জীবনে আর। কমল বিহনে
 ডুবে অভিমানে জলে মৃগাল, যদ্যপি
 হরে কেহ শিরোমণি, মরে ফণী শোকে।
 চূড়শূন্য রথে চড়ি কোন্ বীর যুঝে?
 কি সাধ জীবনে আর? রে দারুণ বিধি,
 অমৃত যে ফলে, আজ বিষাক্ত করিলি
 সে ফলে? অনন্ত আয়ুদায়িনী সুধারে
 না পেয়ে, কি হলাহল লভিনু মথিয়া
 অকুল সাগরে, হয় হিয়া জ্বালাইতে?
 হা ধিক্! হা ধিক্ তোরে নারীকুলাধমা!
 চণ্ডালিনী ব্রহ্মকূলে তুই পাণীয়সী,
 আর তোর পোড়া মুখ কভু না হেরিব,
 যত দিন নাহি পারি তোর যমরূপে

আক্রমিতে রণে তোরে বীরপরাক্রমে।
 ভেবেছিলি লয়ে তোরে সোহাগে বাসরে
 কত যে লো ভালবাসি কব তোর কানে,
 বায়ু যথা ফুলদলে সায়ংকালে পেয়ে
 কাননে। সে প্রেমশায় দিনু জলাঞ্জলি।
 সে সুবর্ণ আশালতা তুই লো নিষ্ঠুরা
 দাবানল-শিখারূপে নিষ্ঠুরে পোড়ালি।
 পশ্ রে বিবরে তোর, তুই কাল ফণী।

তিলোত্তমা-সত্ত্ব

(পুনর্লিখিত অংশ)

প্রথম সর্গ

ধবল নামেতে খ্যাত হিমাদ্রির শিরে
 দেবাশ্রা, ভীষণ-মূর্তি, অত্র-ভেদী গিরি,
 অটল, ধবল-কায়; ব্যোমকেশ যেন
 উর্দ্ধবাহ শুভ্র-বেশে, মজি চিরযোগে,
 যোগী-কূলে পূজ্য যোগী।—কি নিকুঞ্জ-রাজী,
 কি তরু, কি লতা, কিবা ফল-ফুলাবলী,
 আর আর শৈল-শিরে শোভে যা, মঞ্জরি
 মরকত-ময় স্বর্ণ-কিরীটের রূপে;
 না পরেন অচলেন্দ্র অবহেলি সবে,
 বিমুখ ভবের সুখে ভব-ইন্দ্র যেন
 জিতেন্দ্রিয়! সুনাদিনী বিহঙ্গিনী যত,
 বিহঙ্গম সু-নিনাদী, অলি মধু-লোভী,
 কভু নাহি ভ্রমে তথা; সিংহ—বনরাজা,—
 বন-লগুভগু-কারী শুশুধর করী,—
 গণ্ডার, শাদ্দুল, কপি,—বন-বাসী পশু,—
 সুলোচনা কুরঙ্গিনী, বন-কমলিনী,—
 ফণিনী কুম্বলে মণি, ফণী বিষ-ভরা,
 না যায় নিকটে তাঁর—বিকট-শেখরী!
 সতত, তিমিরময়, গভীর গহুরে,
 কোলাহলে জল-দল মহা কোলাহলে,
 ভোগবতী শ্রোতস্বতী পাতালে যেমতি
 কল্পোলিনী! বহে বায়ু ভৈরব আরবে,
 মহা কোপে লয়-রূপে, পূর্ণ তমোগুণে,
 নিশ্বাস ছাড়েন যেন সর্ব-নাশ-কারী!
 কি দানব, কি মানব, যক্ষ, রক্ষঃ, বলী,
 কি দানবী, কি মানবী, কিবা নিশাচরী,
 সকলেরি অগম্য—দুর্গম দুর্গ যেন।
 দিবা নিশি মেঘ-রাশি উড়ে চারি দিকে,
 ভূতেশের সঙ্গে ভূত নাচে রঙ্গে যেন।

এহেন বিজন স্থানে দেব-কুল-পতি
বাসব, বসিয়া কেন একাকী, তা কহ,
পঙ্কজ-বাসিনি দেবি, এ তব কিঙ্করে ?
সুরাসুর সহ অহি অনন্ত, যে বলে
আনন্দে মন্দারে বাঁধি, সিদ্ধুরে মথিলা
অমৃত-রসের আশে,—সেই বল-সম
যাচি কৃপা, কর দয়া আজি অকিঞ্চনে,
বাগ্‌দেবি ! যতনে মথি বাক্যের সাগরে,
কবিতার সুধা যেন পাই তব বলে !
কর দয়া অভাজনে, বিশ্ব-বিমোহিনি !
অসীম মহিমা তব, হায়, দীন আমি,—
কিন্তু যে চন্দ্রের বাস চন্দ্রচূড় চূড়ে,
জননি, শিশির-বিন্দু ক্ষুদ্র ফুল-দলে
লভে না কি আভা কভু তাঁর শোভা হতে ?

কোথা সে ত্রিদিব, যার ভোগ লভিবারে,
কঠোর তপস্যা নর করে যুগে যুগে,
কত শত নরপতি রত অশ্বমেধে,
সগর রাজার বংশ ধ্বংস, মা, যে লোভে ?
কোথা সে অমরাবতী—পূর্ণ চির-সুখে ?
কোথা বৈজয়ন্ত-ধাম, রত্নময়ী পুরী,
মলিন প্রভায় যার প্রভাকর ভানু ?
কোথায় সে রাজ-ছত্র, রাজাসন কোথা,
রবি-পরিধির আভা মেরু-শৈলোপরি !
কোথায় নন্দন-বন, বসন্ত যে বনে
বিরাজেন নিত্য সুখে ? পারিজাত কোথা,
অক্ষয়-লাবণ্য ফুল ? ঋষি-মনোহরা
কোথা সে উর্বশী, কহ ? কোথা চিত্রলেখা,
জগত-জনের চিন্তে লেখা বিধুমুখী ?
অলকা, তিলকা, রত্না, ভুবন-মোহিনী ?
মিশ্রকেশী, যার চারু কেশ দিয়া গড়ি
নিগড়, বাঁধেন কাম স্বর্গ-বাসী জনে ?
কোথায় কিম্বর, কোথা বিদ্যাধর যত ?
গন্ধর্ব, মদন-গর্ব খর্ব যার রূপে,—
গন্ধর্ব-কুলের রাজা চিত্ররথ রথী,
কামিনীর মনোরথ, নিত্য অরি-দমী
দৈত্য-রণে ? কোথা, মা, সে ভীষণ অশনি,
যার দ্রুত ইরম্মদে, গভীর গর্জনে,
দেব-কলেবর কাঁপে থর থর করি,
ভূধর অধীর ভয়ে, ভুবন চমকে
আতঙ্কে ? কোথা সে ধনুঃ, ধনুঃ-কুল-মণি
আভাময়, যার চারু রত্ন-কান্তি-ছটা
নব নীরদের শিরে ধরে শোভা, যথা

শিখীর পুচ্ছের চূড়া রাখালের শিরে ?
কোথায় পুষ্কর, কোথা আবর্ভক, দেবি,
ঘনেশ্বর ? কোথা, কহ, সারথি মাতলি ?
কোথা সে সুবর্ণ-রথ, মনোরথ-গতি,
যার স্থিরপ্রভা দেখি ক্ষণ-প্রভা লাজে
অস্থিরা, লুকায় মুখ, ক্ষণ দিয়া দেখা,
(কাদম্বিনী স্বজনীর গলা ধরি কাঁদি)
অম্বরে ? কোথায় আজি ঐরাবত বলী,
গজেন্দ্র ? কোথায় হয় উচ্চৈঃশ্রবা, কহ,
হয়েশ্বর, আশুগতি যথা আশুগতি ?
কোথায় পৌলোমী সতী অনন্ত-যৌবনা,
দেবেন্দ্র-হৃদয়-সরে প্রফুল্ল নলিনী,
ত্রিদিব-লোচনানন্দ, আয়ত-লোচনা
রূপসী ? কোথায় এবে স্বর্গ-কল্পতরু,
কামদা বিধাতা যথা ; যে তরুর পদে,
আনন্দে নন্দন-বনে দেবী মন্দাকিনী
বহেন, বিমল-আভা, কল কল রবে ?
কোথা মূর্ত্তমান্ন রাগ, ছত্রিশ রাগিণী
মূর্ত্তমতী—নিত্য যারা সেবিত দেবেশে ?
সে দেব-বিভব সব কোথা, কহ, এবে,
কোথা সে দেব-মহিমা—দেবি বীণাপাণি ?

দুরন্ত দানব-দ্বয়, দৈব-বলে বলী,
বিমুখি সমুখ রণে দেব দেব-রাজে,
পুরি দেবরাজ-পুরী ঘোর কোলাহলে,
লুটি দেবরাজ-পুর-বৈভব, বিনাশি
(দ্বেষ-বিষে জ্বলি) হায়, দেব-রাজ-পুরে
সে পুরের অলঙ্কার, অহঙ্কারে আজি
বসিয়াছে রাজাসনে দেব-রাজ-ধামে
পামর ! যেমতি শ্বাস রুদ্রের, প্রলয়ে
বাতময়, উথলিলে জল-সমাকুলে,
প্রবল তরঙ্গ-দল, অবহেলি রোধে,
ধরার কবরী হতে ছিঁড়ি লয় কাড়ি
সুবর্ণ কুসুম-দাম ; যে সুন্দর বপুঃ
আনন্দে মদন-সখা সাজান আপনি
দিয়া নানা ফুল-সাজ ; সে সুন্দর বপুঃ
ফুল-সাজ-শূন্য বন্যা করে অনাদরে,—
গভীর হৃদ্ধারে পশে রম্য বন-স্থলে !

দ্বাদশ বৎসর যুঝি দিতিজারি যত,
দুর্জয় দিতিজ-ভূজ-প্রতাপে তাপিয়া
(হীন-বল দৈব-বলে) ভঙ্গ দিলা রণে
আতঙ্কে । দাবান্নি যথা, সঙ্গে সখা বায়ু,
হৃদ্ধারে প্রবেশিলে গহন কাননে,

হেরি ভীম শিখা-পুঞ্জ ধূম-পুঞ্জ মাঝে,
 চণ্ড মুণ্ড-মালিনীর লোল জিহ্বা যেন
 (রক্ত-বীজ-কুল-কাল!) আক্ত রক্ত-রসে ;
 পরমাদ গণি মনে পলায় কেশরী
 মুগেন্দ্র ; করীন্দ্র-বৃন্দ পলায় তরাসে
 উর্দ্ধশ্বাস ; মৃগদল ধায় বায়ু-বেগে ;
 কুরঙ্গ সুশৃঙ্গধর, ভুজঙ্গ চৌদিকে
 পলায় ; পলায় শূন্যে বিহঙ্গম উড়ি ;
 পলায় মহিষ-দল, রোষে রাঙা আঁখি,
 কোলাহলে পুরি দেশ ক্ষিতি টলমলি ;
 পলায় গণ্ডার, বন লণ্ডভণ্ড করি
 পলায়নে ; ধায় বাঘ ; ধায় প্রাণ লয়ে
 ভল্লুক বিকটাকার ; আর পশু যত
 বলবন্ত, কিন্তু ভয়ে বলশূন্য এবে ;—
 অব্যর্থ কুলিশে ব্যর্থ হেরি সে সমরে,
 পলাইলা পরিহরি সমর কুলিশী
 পুরন্দর ; পলাইলা জল-দল-পতি
 পাশী, সর্কনাশী পাশে হেরি (দৈব-বলে)
 স্রিয়মাণ, মহোরগ যেন মস্ত্র-তেজে !
 পলাইলা ঝড়াকারে বায়ু-কুল-পতি ;
 পলাইলা শিখি-পৃষ্ঠে শিখিধ্বজ রথী
 সেনানী ; মহিষাসনে সর্ক-অস্ত-কারী
 কৃতান্ত, কৃতান্ত-দূতে হেরিলে যেমতি
 সহসা, পলায় প্রাণী প্রাণ বাঁচাইতে !
 পলাইলা গদাধারী অলকার পতি,
 ব্যর্থ গদা হাতে, হায়, দুর্ব্যোধন যথা
 মিত্র ক্ষত্র-শূন্য দেখি কুরুক্ষেত্রে, গেলা
 (বিষাদে নিশ্বাসি ঘন!) জলাশয় পানে,
 একাকী, সহায়-হীন।—পলাইলা এবে
 দেবগণ, রণভূমি ত্যজি অভিমানে ;
 পুরিল জগত দৈত্য জয় জয় নাদে,
 বসিল দেবারি দুষ্ট দেব-রাজাসনে,
 হর-কোপানল যেন, মদনে দহিয়া,
 বিরহ-অনল-রূপে, ভৈরবে বেড়িল
 রতির কোমল হিয়া, হায়, পোড়াইতে
 সে হিয়া, কেন না রতি স্থাপি সে মন্দিরে
 নিত্যানন্দ মদনের মুরতি, সুন্দরী
 পূজেন আদরে, শ্রেম-ফুলাঞ্জলি দিয়া।
 সুন্দ উপসুন্দাসুর, দ্বন্দ্বি সুর সহ
 লণ্ডভণ্ড করিল অখিল ভূমণ্ডলে। ইত্যাদি—

ভারত-বৃত্তান্ত দ্রৌপদীস্বয়ম্বর

কেমনে রথীন্দ্র পার্থ স্ববলে লভিলা
 পরাভবি রাজবন্দে চারুচন্দ্রাননা
 কৃষ্ণায়, নবীন ছন্দে সে মহাকাহিনী
 কহিবে নবীন কবি বঙ্গবাসী জনে,
 বাগ্বেদবি। দাসেরে যদি কৃপা কর তুমি।
 না জানি ভকতি স্তুতি, না জানি কি ক'রে
 আরাধি হে বিশ্বাধাধ্য তোমায় ; না জানি
 কি ভাবে মনের ভাব নিবেদি ও পদে !
 কিন্তু মার প্রাণ কভু নারে কি বুঝিতে
 শিশুর মনের সাধ, যদিও না ফুটে
 কথা তার ? উর তবে, উর মা, আসরে।
 আইস মা এ প্রবাসে বঙ্গের সঙ্গীতে
 জুড়াই বিরহজ্বালা, বিহঙ্গম যথা
 রঙ্গহীন কুপিঞ্জরে কভু কভু ভুলে
 কারাগারদুখ সাধি কুঞ্জবনস্বরে।
 সত্যবর্তীসতীসূত, হে গুরু, ভারতে
 কবিতা-সুধার সরে বিকচিত চির
 কমল দ্বিতীয় তুমি ; কৃতাজলিপুটে
 প্রণমে চরণে দাস, দয়া কর দাসে।
 হায় নরাধম আমি! ডরি গো পশিতে
 যথায় কমলাসনে আসীনা দেউলে
 ভারতী ; তেঁই হে ডাকি দাঁড়য়ে দূয়ারে,
 আচার্য্য। আইস শীঘ্র দ্বিজোত্তম সুরি।
 দাসের বাসনা, ফুলে পূজি জননীরে,
 বর চাহি দেহ ব্যাস, এই বর মাগি।

গভীর সুডঙ্গপথে চলিলা নীরবে
 পঞ্চ ভাই সঙ্গে সতী ভোজেন্দ্রনন্দিনী
 কুন্তী ; স্বরচিত-গৃহে মরিল দুর্ন্যতি
 পুরোচন ; * * *

দ্রৌপদীস্বয়ম্বর

কেমনে রথীন্দ্র পার্থ পরাভবি রণে
 লক্ষ রণসিংহ শুরে পাঞ্চাল নগরে
 লভিলা ঋপদবালা কৃষ্ণ মহাধনে,
 দেবের অসাধ্য কর্ম সাধি দেববরে,—
 গাইব সে মহাগীত। এ ভিক্ষা চরণে,
 বাগ্বেদবি। গাইব মা গো নব মধুস্বরে,

কর দয়া, চিরদাস নমে পদাশ্বজে,
দয়ায় আসরে উর, দেবি শ্বেতভুজে !

* * *

বিধিলা লক্ষ্যে পার্থ, আকাশে অঙ্গুরী
গাইল বিজয়গীত, পুষ্পবৃষ্টি করি
আকাশসম্ভবা দেবী সরস্বতী আসি
কহিলা এ সব কথা কৃষ্ণগণে সম্ভাষি।

লো পঞ্চালরাজসূতা কৃষ্ণ গুণবতি,
তব প্রতি সুপ্রসন্ন আজি প্রজাপতি।
এত দিনে ফুটিল গো বিবাহের ফুল।
পেয়েছ সুন্দরি! স্বামী ভুবনে অতুল।
চেন কি উঁহারে উনি কোন্ মহামতি,
কত গুণে গুণবান্ জানো কি লো সতি ?
না চেনো না জানো যদি শুন দিয়া মন,
ছদ্মবেশী উনি ধনি, নহেন ব্রাহ্মণ।
অত্যাচ ভারতবংশশিরে শিরোমণি
কুন্তীর হৃদয়নিধি বিখ্যাত ফাল্গুনি।
ভস্মরাশি মাঝে যথা লুপ্ত হুতশন
সেইরূপ ক্ষত্রতেজ আছিল গোপন।
আগ্নেয়গিরির গর্ভ করি বিদারণ
যথা বেগে বাহিরয় ভীম হুতশন,
অথবা ভেদিয়া যথা পূর্বব গগন
সহসা আকাশে শোভে জ্বলন্ত তপন,
সেইরূপ এতদিনে পাইয়া সময়,
লুপ্ত ক্ষত্রতেজ বহি হইল উদয়।

মৎসগন্ধা

চেয়ে দেখ, মোর পানে, কলকল্পোলিনি
যমুনে! দেখিয়া, কহ, শুনি তব মুখে,
বিধুমুখি, আছে কি গো অখিল জগতে,
দুর্গমিনী দাসীর সম? কেন যে সৃজিলা,
কি হেতু বিধাতা, মোরে, বুঝিব কেমনে?
তরুণ যৌবন মোর! না পারি লড়িতে
পোড়া নিতম্বের ভরে। কবরীবন্ধন
খুলি যদি, পোড়া চুল পড়ে ভূমিতলে।
কিন্তু, কে চাহিয়া কবে দেখে মোর পানে?
না বসে গুঞ্জরি সখি, শিলীমুখ যথা
শ্বেতাশ্বরা ধৃত্তরার নীরস অধরে,
হেরি অভাগীকে দূরে ফিরে অধোমুখে
যুবকুল; কাঁদি আমি বসি লো বিরলে।

সুভদ্রা-হরণ

প্রথম সর্গ

কেমনে ফাল্গুনি শুর স্বগুণে লভিলা
(পরভবি যদু-বৃন্দে) চারু-চন্দ্রানা
ভদ্রায়;—নবীন ছন্দে সে মহাকাহিনী
কহিবে নবীন কবি বঙ্গবাসি-জনে
বাগ্বেদবি, দাসেরে যদি কৃপা কর তুমি।
না জানি ভকতি, স্তুতি; না জানি কি করে,
আরাধি, হে বিশ্বাধায়ে, তোমায়; না জানি
কি ভাবে মনের ভাব নিবেদি ও পদে!
কিন্তু মার প্রাণ কভু নারে কি বুঝিতে
শিশুর মনের সাধ, যদিও না ফুটে
কথা তার? কৃপা করি উর গো আসরে।
আইস, মা, এ প্রবাসে, বঙ্গের সঙ্গীতে
জুড়াই বিরহ-জ্বালা, বিহঙ্গম যথা,
করাবন্ধ পিজিরায়, কভু কভু ভুলে
কারণার-দুখ, স্মরি নিকুঞ্জের স্বরে!

ইন্দ্রপ্রস্থে পঞ্চ ভাই পাঞ্চালীকে লয়ে
কৌতুকে করিলা বাস। আদরে ইন্দ্রিরা
(জগত-আনন্দময়ী) নব-রাজ-পুরে
উরিলা; লাগিল নিত্য বাড়িতে চৌদিকে
রাজ-শ্রী, শ্রীবরদার পদের প্রসাদে!—
এ মঙ্গলবার্তা শুনি নারদের মুখে
শচী, বরাজনা দেবী, বৈজয়ন্ত-ধামে
রুধিলা! জ্বলিল পুনঃ পূর্বকথা স্মরি,
দাবানল-রূপ রোষ হিয়া-রূপ বনে,
দগধি পরাণ তাপে! “হা ধিক্!”—ভাবিলা
বিরলে মানিনী মনে—“ধিক্ রে আমারে!
আর কি মানিবে কেহ এ তিন ভুবনে
অভাগিনী ইন্দ্রাণীকে? কেন তাকে দিলি
অনন্ত-যৌবন-কান্তি, তুই, পোড়া বিধি?
হায়, কারে কব দুখ? মোরে অপমানি,
ভোজ-রাজ-বালা কুন্তী—কুল-কলঙ্কিনী,—
পাপীয়াসী—তার মান বাড়ান কুলিশী?
যৌবন-কুহকে, ধিক্, যে ব্যভিচারিণী
মজাইল দেব-রাজে, মোরে লাজ দিয়া।
অর্জুন—জারজ তার—নাহি কি শকতি
আমার—ইন্দ্রাণী আমি—মারি সে অর্জুনে,
এ পোড়া চখের বালি?—দুর্যোধনে দিয়া
গড়াইনু জতুগৃহ; সে ফাঁদ এড়ায়ে
লক্ষ্য বিধি, লক্ষ রাজে বিমুখি সমরে

পাঞ্চালীয়ে মন্দমতি লভিল পঞ্চালে।
অহিত সাধিতে, দেখ, হতাশ হইনু
আমি, ভাগ্য-গুণে তার।—কি ভাগ্য?

কে জানে?

কোন দেবতার বলে বলী ও ফাঙ্কুনি?
বুঝি বা সহায় তার আপনি গোপনে
দেবেন্দ্র? হে ধর্ম, তুমি পার কি সহিতে
এ আচার চরাচরে? কি বিচার তব!
উপপত্নী কুস্তীর জারজ পুত্র প্রতি
এত যত্ন? কারে কব এ দুখের কথা—
কার বা শরণ, হায়, লব এ বিপদে?”
কঙ্কণ-মণ্ডিত বাহু হানিলা ললাটে
ললনা। দুকুল সাড়ী তিতি গলগলে
বহিল আঁখির জল, শিশির যেমতি
হিমকালে পড়ি আর্দ্রে কমলের দলে!
“যাইব কলির কাছে” আবার ভাবিলা
মানিনী—“কুটিল কলি খ্যাত ত্রিভুবনে,—
এ পোড়া মনের দুঃখ কব তার কাছে,
এ পোড়া মনের দুখ সে যদি না পারে
জুড়াতে কৌশল করি, কে আর জুড়াবে?
যায় যদি মান, যাক! আর কি তা আছে?”
ইত্যাদি।

পাণ্ডববিজয়

কেমনে সংহারি রণে কুরুকুলরাজে,
কুরুকুল-রাজাসন লভিলা দ্বাপরে
ধর্মরাজ;—সে কাহিনী, সে মহাকাহিনী,
নব রঙ্গে বঙ্গজনে, উরি এ আসরে,
কহ, দেবি! গিরি-গৃহে সুকালে জনমি
(আকাশ-সম্ভবা ধাত্রী কাদম্বিনী দিলে
স্তন্যামৃতরূপে বারি) প্রবাহ যেমতি
বহি, ধায় সিঙ্কুমুখে, বদরিকাশ্রমে,
ও পদ-পালনে পুষ্ট কবি-মনঃ, পুনঃ
চলিল, হে কবি-মাতঃ, যশের উদ্দেশে।
যথা সে নদের মুখে সুমধুর ধ্বনি,
বহে সে সঙ্গীতে যবে মঞ্জু কুঞ্জান্তরে
সমদেশে; কিম্বৎ ঘোর কল্লোল, যেখানে
শিলাময় স্থল রোধে অবিরলগতি;—
দাসের রসনা আসি রস নানা রসে,
কভু রৌদ্রে, কভু বীরে, কভু বা করুণে—
দেহ ফুলশরাসন, পঞ্চফুলশরে।

দুর্যোধনের মৃত্যু

“দেখ, দেব, দেখ চেয়ে,” কাতরে কহিলা
কুরুরাজ কৃপাচার্যে,—“আসিছেন ধীরে
নিশীথিনী; নাহি তারা কবরী-বন্ধনে,—
না শোভে ললাটদেশে চারু নিশামণি!
শিবির-বাহিরে মোরে লহ কৃপা করি,
মহারথ! রাখ লয়ে যথায় ঝরিবে
এ ভূনত-শিরে এবে শিশিরের ধারা,
ঝরে যথা শিশুশিরে অবিরল বহি
জননীর অশ্রুজল, কালগ্রাসে যবে
সে শিশু!” লইলা সবে ধরাধরি করি
শিবির বাহিরে শুরে—ভগ্ন-উরু রণে!

মহাযত্নে কৃপাচার্য পাতিল ভূতলে
উত্তরী। বিষাদে হাসি কহিলা নৃমণি;—
“কার হেতু এ সুশয্যা, কৃপাচার্য রথি?
পড়িনু ভূতলে, প্রভু, মাতৃগর্ভ ত্যজি;—
সেই বাল্যাসন ভিন্ন কি আসন সাজে
অস্ত্রিমে? উঠাও বস্ত্র, বসি হে ভূতলে!
কি শয্যায় সুপ্ত আজি কুরুবীর্যরূপী
গাঙ্গয়ে? কোথায় গুরু দ্রোণাচার্য রথী,
কোথা অঙ্গপতি কর্ণ? আর রাজা যত
ক্ষত্র-ক্ষেত্র-পুষ্প, দেব! কি সাথে বসিবে
এ হেন শয্যায় হেথা দুর্যোধন আজি?
যথা বনমাঝে বহি জ্বলি নিশায়োগে
আকর্ষি পতঙ্গচয়ে, ভস্মেন তা সবে
সর্বভুক—রাজদলে আহুনি এ রণে—
বিনাশিনু আমি, দেব! নিঃক্ষত্র করিনু
ক্ষত্রপূর্ণ কস্মিক্ষেত্র নিজ কস্মদোষে।
কি কাজ আমার আর বৃথা সুখভোগে?
নির্বার্ণ পাবক আমি, তেজশূন্য, বলি!
ভস্মমাত্র! এ যতন বৃথা কেন তব!”

সরায়ে উত্তরী শুর বসিলা ভূতলে।
নিকটে বসিলা কৃপ কৃতবর্মা রথী
বিষাদে নীরব দাঁহে;—আসি নিশীথিনী,
মেঘরূপ ঘোমটায় বদন আবারি,
উচ্চ বায়ু-রূপ শ্বাসে সঘনে নিশ্বাসি;—
বৃষ্টি-ছলে অশ্রুবারি ফেলিলা ভূতলে।
কাতরে কহিলা চাহি কৃতবর্মা পানে
রাজেন্দ্র; “এ হেন ক্ষেত্রে, ক্ষত্রচূড়ামণি,
ক্ষত্র-কুলোদ্ভব, কহ, কে আছে ভারতে,
যে না ইচ্ছে মরিবারে? যেখানে, যে কালে

আক্রমেন যমরাজ ; সমপীড়া-দায়ী
 দশু তাঁর,—রাজপুরে, কি ক্ষুদ্র কুটারে,
 সম ভয়ঙ্কর প্রভু, সে ভীম মুরতি !
 কিন্তু হেন স্থলে তাঁরে আতঙ্ক না করি
 আমি।—এই সাধ ছিল চিরকাল মনে।
 যে স্তম্ভের বলে, শির উঠায় আকাশে
 উচ্চ রাজ-অট্টালিকা, সে স্তম্ভের রূপে
 ক্ষুদ্রকুল-অট্টালিকা ধরিনু স্ববলে
 ভূভারতে। ভূপতিত এবে কালে আমি ;
 দেখ চেয়ে চারি দিকে ভগ্ন শত ভাগে
 সে সুঅট্টালিকা চূর্ণ এ মোর পতনে।
 গড়ায় এক্ষেত্রে পড়ি গৃহচূড়া কত !
 আর যত অলঙ্কার—কার সাধ্য গণে ?
 কিন্তু চেয়ে দেখ সবে, কি আশ্চর্য্য ! দেখ—
 রকত বরণে দেখ, সহসা আকাশে
 উদিচ্ছেন ও পৌরব বংশ-আদি যিনি,
 নিশানাথ ! দুর্যোধনে ভূশযায় হেরি
 কুবরণ হইলা কি শোকে সুধানিধি ?”
 পাণ্ডব-শিবির পানে ক্ষণেক নিরখি
 উত্তরীলা কৃপাচার্য্য ;—“হে কৌরবপতি,
 নহে চন্দ্র যাহা, রাজা, দেখিছ আকাশে,
 কিন্তু বৈজয়ন্তী তব সর্বভুকরূপে !
 রিপুকুল-চিতা, দেব, জ্বলিয়া উঠিল।
 কি বিষাদ আর তবে ? মরিছে শিবিরে
 অগ্নি-তাপে ছটফট ভীম দৃষ্টমতি ;
 পুড়িছে অর্জুন, রায়, তার শরানলে,
 পুড়িল যেমতি হেথা সৈন্যদল তব !
 অস্ত্রিমে পিতায় স্মরে যুধিষ্ঠির এবে ;
 নকুল ব্যাকুলচিত সহদেব সহ !
 আর আর বীর যত এ কাল সমরে
 পাইয়াছে রক্ষা যারা, দাবদন্ধ বনে
 আশে পাশে তরু যথা ;—দেখ মহামতি !”

সিংহল-বিজয়

স্বর্ণসৌধে সুধাধরা যক্ষেন্দ্রমোহিনী
 সুরজা, শুনি সে ধ্বনি অলকা নগরে,

বিস্ময়ে সাগর পানে নিরখি, দেখিলা
 ভাসিছে সুন্দর ডিঙ্গা, উড়িছে আকাশে
 পতাকা, মঙ্গলবাদ্য বাজিছে চৌদিকে !
 রুধি সতী শশিমুখী সখীয়ে কহিলা ;—
 হেদে দেখ, শশিমুখি, আঁখি দুটি খুলি,
 চলিছে সিংহলে ওই রাজ্যলাভ-লোভে
 বিজয়, স্বদেশ ছাড়ি লক্ষ্মীর আদেশে !
 কি লজ্জা ! থাকিতে প্রাণ না দিব লইতে
 রাজ্য ওরে আমি, সই ! উদ্যানস্বরূপে
 সাজানু সিংহলে কি লো দিতে পরজনে ?
 জ্বলে রাগে দেহ, যদি স্মরি শশিমুখি,
 কমলার অহঙ্কার ; দেখিব কেমনে
 স্বদাসে আমার দেশ দানেন ইন্দিরা ?
 জলধি জনক তাঁর ; তেঁই শান্ত তিনি
 উপরোধে। যা, লো সই, ডাক সারথিরে
 আনিতে পুষ্পক হেথা। বিরাজেন যথা
 বায়ুরাজ, যাব আজি ; প্রভঞ্নে লয়ে
 বাধাব জঞ্জাল, পরে দেখিব কি ঘটে ?
 স্বর্ণতেজঃপুঞ্জ রথ আইল দুয়ারে
 ঘর্ঘরি। হ্রৈষিল অশ্ব, পদ-আস্ফালনে
 সৃজি বিস্মুলিঙ্গবন্দে। চড়িলা স্যন্দনে
 আনন্দে সুন্দরী, সাজি বিমোহন সাজে।

দেবদানবীয়ম্

মহাকাব্য

প্রথম সর্গঃ

কাব্যেকখানি রচিবারে চাহি,
 কহো কি ছন্দঃ পছন্দঃ দেবি !
 কহো কি ছন্দঃ মনানন্দ দেবে
 মনীষবন্দে এ সুবঙ্গদেশে ?
 তোমার বীণা দেহ মোর হাতে,
 বাজাইয়া তায় যশস্বী হবো,
 অমৃতরূপে তব কৃপাবারি
 দেহো জননি গো, ঢালি এ পেটে ॥